

ԳԵՈՐԳԻ ԳԵՈՂԱԿՅԱՆ

«ԷՋԵՐ ՀԱՅ ԵՐԱԺՇՏՈՒԹՅԱՆ ՊԱՏՄՈՒԹՅՈՒՆԻՑ»

ՀՀ ԳԱԱ «ԳԻՏՈՒԹՅՈՒՆ» ՀՐԱՏԱՐԱԿՉՈՒԹՅՈՒՆ,
ԵՐԵՎԱՆ 2009,

Էջ 73-84

ՀԱՅ ԵՐԱԺՇՏՈՒԹՅԱՆ ՀԱՆՃԱՐԸ

Կոմիտասն արտասովոր երևույթ է: Նա խոշոր գիտնական էր և միևնույն ժամանակ նրբազգաց, անգուգական արվեստագետ-ստեղծագործող: Այն խնդիրը, որ նա դրել էր իր առաջ, առաջին հայացքից, իր բնույթով ավելի շատ հիշեցնում էր հետազոտողի խնդիր, քան արվեստագետի: Անխոնջ հնագետի կամ, թերևս, վերականգնիչ-արվեստագետի նման նա մանրակրկիտ կերպով «մաքրում» էր դարերով կուտակված օտար շերտավորումները, որպեսզի կարողանա երևան հանել ազգային երաժշտության նախաստեղծ էությունը:

Կոմիտասին իրավամբ պատկանում է հայ ժողովրդական երաժշտության մեծածավալ և արժեքավորագույն բնագավառի՝ գեղջկական ֆոլկլորի հայտնագործությունը: Նրանից առաջ ծանոթությունն այդ ոլորտին հիմնված էր պատահական և բնավ ոչ ամենաբնորոշ նմուշների վրա: Կոմիտասի բազմաթիվ գրառումներում գեղջկական երգը ներկայացավ իր հնարավոր լիակատար տեսքով և պահպանվեց մոռացումից ու անվերադարձ ոչնչացումից:

Այդ փաստն ինքնին արդեն բավական էր, որպեսզի Կոմիտասին ամենապատվավոր տեղն ապահովեր ազգային մշակույթի խոշորագույն գործիչների շարքում: Սակայն Կոմիտասը շատ ավելին արեց: Ազգագրության և տեսական հարցերով նրա զբաղմունքը նեղ ակադեմիական բնույթ չէր կրում: Դրանք հետաքրքրում էին նրան առաջին հերթին իբրև արվեստագետի, որը ձգտում էր վերականգնել անցած դարերի ազգային արվեստի՝ հայ երաժշտության մեջ մոռացված ավանդույթները: Վերականգնել մասնագիտացված երաժշտական մշակույթի ժամանակակից պատկերացումներին համապատասխան մակարդակով:

Կոմիտասին հաջողվեց փայլուն կերպով լուծել այդ դժվարին խնդիրը: Նա ստեղծեց մի ինքնատիպ երաժշտական ոճ, որն անմիջականորեն կապված էր գեղջկական երգի և հայ միջնադարյան հոգևոր երաժշտության հետ: Կոմիտասի ոճը, նրա մոտեցումը ժողովրդական և հոգևոր երաժշտության նկատմամբ զգալիորեն տարբերվում էին եվրոպական դասական երաժշտության մեջ ձևավորված սկզբունքներից և մոտ էին արդիականության առավել առաջավոր կոմպոզիտորների որոնումներին:

Կոմիտասի ստեղծագործությունն ասես բացահայտեց ազգային երաժշտության անցյալ դարերի անծայրածիր հեռուն, տարավ դեպի նրա ծագման բուն ակունքները և միաժամանակ այն ուղղված էր ապագային, անքակտելիորեն կապված էր համաշխարհային երաժշտական արվեստի զարգացման նոր դարաշրջանի հետ: Եվ հենց դրանով է բացատրվում Կոմիտասի արվեստի ազդեցության համատարած բնույթը հայ երաժշտության հետագա զարգացման վրա:

Կոմիտասը /Սողոմոն Սողոմոնյան/ ծնվել է 1869 թ. սեպտեմբերի 26-ին Անատոլիայի /Թուրքիա/ կենտրոնում գտնվող Կուտինա /Քյոթահիա/ քաղաքում: «Սողոմոնյանները ու քյոթահիացի հայ հին ընտանիքները, - գրում է Կոմիտասը ինքնակենսագրության մեջ, - գաղթել են 17-րդ դարու վերջում Գողթն գավառի Ցղնա գյուղից»[1]:

Դեռ վաղ հասակում նա զրկվել է ծնողներից և ճաշակել որբության դառնությունը: Նրա համար շատ հաճախ ապրուստի միջոց է ծառայել ձայնը՝ զրնգուն ու վճիտ: «Թափառական փոքրիկ երգիչ»՝ այս անունն ամուր հաստատվեց նրա վրա Կուտինայում: Իր սքանչելի ձայնին էլ նա պարտական էր այն կարևոր իրադարձության համար, որ շուտով կտրուկ փոխեց նրա կյանքի ընթացքը:

1881թ. տեղի վանահայր Գևորգ վարդապետ Դերձակյանը եպիսկոպոսի կարգ ստանալու համար պետք է մեկներ Էջմիածին: Կաթողիկոսի Կոնդակի համաձայն նա պետք է իր հետ բերեր մի «ձայնեղ» որբ տղա՝ հոգևոր ճեմարանում ուսում ստանալու: Ընտրությունը կանգ առավ Սողոմոնի վրա:

Հոկտեմբերի 1-ին Սողոմոնը Գևորգ վրդ. Դերձակյանի հետ ներկայացավ Գևորգ Դ. Կաթողիկոսին: «Բազմած էր Հայոց Հայրապետը, - հիշում էր Կոմիտասը հետագայում, - պատկառելի մի ծերունի: Սկսավ ինձ հարցովորձ անել: Ես ապուշ էի կտրել մնացել, չէի հասկանում, թե ինչ էր ասում, որովհետև խոսում էր հայերեն, իսկ ես, որպես և մեր քաղաքացիք, տաճկախոս էի, թեև հայերեն գրել կարդալ գիտեի, բայց բոլոր առարկաները անցել էի տաճիկ լեզվով, ուստի և չէի հասկանում կարդացածս ու հայերենը: Վեհը տեսավ, որ ես հայերեն չեմ իմանում, ասաց տաճկերեն լեզվով.

- Դու գուր ես եկել այստեղ, որովհետև մեր ճեմարանում ամեն բան հայերեն են անցնում:

Ես էլ առանց քաշվելու, մանկական միամտությամբ, համարձակություն եկավ վրաս և ասացի, թե «Ես եկել եմ հայերեն սովորելու»:

-Էհ, լավ, ձայն ունե՞ս և երգել գիտե՞ս:

-Այո, ունեմ ու գիտեմ:

- Ի՞նչ երգեր գիտես:

- Ինչ ասես գիտեմ, հայերեն, տաճկերեն, եկեղեցական, աշխարհական:

- Շատ լավ, «Լույս զվարթը» գիտե՞ս:

- Գիտեմ:

«Լույս զվարթը» երգելիս նկատեցի, թե ինչպես նորա աչքից արցունքները գլորվում էին ու թավալվելով երկար ճերմակ մորուսի վրայով գլորվում էին վերարկուի ծալքերի մեջ:

- Ասոր ճեմարան տարեք, - հրամայեց Վեհը Մանկունի Վահրամ եպիսկոպոսին՝ իր «դիվանագետին»:[2]

Լեզվի հետ կապված դժվարությունները շուտով հաղթահարվեցին: Հաջողությամբ էին ընթանում նաև մյուս առարկաների, այդ թվում և նոր հայկական նոտագրության տիրապետման պարապմունքները: Երաժշտական իր առաջին ուսուցչի՝ Ղևոնդ վրդ. Հովակիմյանի դասարանում նա սկսում է ծանոթանալ հայկական եկեղեցական երգարվեստին, իսկ ավելի ուշ՝ Սահակ վրդ. Ամատունու ղեկավարությամբ խորանում է շարականագիտության մեջ:

Ճեմարանում Կոմիտասը մոտիկից առնչվեց հայ եկեղեցական երաժշտության աշխարհին: Նրան գերեց դարերի խորքից եկող եղանակների զուսպ ու հանդիսավոր գեղեցկությունը՝ մերթ հուզականությամբ լեցուն, մերթ ասես մշուշված վերերկրային խորհրդավոր լույսով: Նա ոչ միայն ինքն էր հրաշալի երգում եկեղեցական երգասացությունները, այլև մանրակրկիտ գրանցում էր դրանք, համեմատում, ուսումնասիրում: Կոմիտասի առաջին թվագրված ձեռագրերից են՝ Հրեշտակապետաց կանոնի օրհնությունը (Էջմիածին, 1887 թ.) և Պատարագի երգերի ու տաղերի երկու ժողովածուները, կազմված Կուտինայում (1892թ.) և Էջմիածնում (1893թ.): Այդ տարիների իր ուսումնասիրության արդյունքները նա ընդհանրացրեց «Հայկական եկեղեցական մեղեդիներ» մեծ հոդվածում՝ հրատարակված Էջմիածնի «Արարատ» ամսագրում:

1893-ին նա ավարտում է ճեմարանը, որպես ավարտական աշխատանք ներկայացնելով «Շնորհալին՝ նորա դարը եւ նորա ժամանակ յուզուած կրօնական խնդիրները» ուսումնասիրությունը: Նույն տարվա հոկտեմբերից Կաթողիկոս Խրիմյան Հայրիկի հրամանով նա փոխարինում է Ք. Կարա-Մուրզային՝ ստանձնելով ճեմարանի երաժշտության դասատուի և Մայր տաճարում՝ խմբավարի պաշտոնները: 1894թ. սեպտեմբերի 11-ին Սողոմոնը կուսակրոն արեղա ձեռնադրվելու կապակցությամբ ստանում է 7-րդ դարի նշանավոր բանաստեղծ, երաժիշտ Կոմիտաս կաթողիկոսի անունը: 1895թ. փետրվարի 26-ին նրան շնորհվում է վարդապետական աստիճան:

Դեռ պատանեկան տարիներից Սողոմոնին գրավում էր նաև ժողովրդական երաժշտությունը: Զանալով աննկատ մնալ, նա ժամերով կարող էր ունկնդրել ժողովրդական երգերն ու պարերը: Դրանց մեղեդիները մխրճվում էին հիշողության մեջ և որպես անտես ուղեկիցներ՝ դեռ երկար ժամանակ նրա հետ էին: 15-16 տարեկանից նա սկսեց գրի առնել ժողովրդական մեղեդիները: Երաժշտական բացառիկ լսողությունը թույլ էր տալիս նրան այդ անել ճշգրտությամբ ու կատարելապես: Գրառելիս նա օգտվում էր հայկական ձայնանիշերից, որոնք

հնարավորություն էին տալիս այդ պահին տեղում, համարյա սղագրական արագությամբ գրառել ամենանուրբ ու բարդ ժողովրդական եղանակների առանձնահատկությունները: 1895թ. նրա հրապարակած Ակնա ժողովրդական երգերի ոչ մեծ ժողովածուն առանձնանում էր գրառման անթերի կատարմամբ և գիտական ակնառու արժեք էր ներկայացնում:

Կոմիտասը եվրոպական երաժշտությանը առաջին անգամ մոտիկից շփվեց, հավանաբար, Էջմիածնի ճեմարանում Ք. Կարա-Մուրզայի դասերին: Եվրոպական բազմաձայնությանը ծանոթանալը շնորհալի պատանուն ցույց տվեց այն վիթխարի հնարավորությունները, որ բացվում էին ազգային երաժշտական մշակույթի առջև: Աստիճանաբար հասունացավ և երաժշտական կրթությունը շարունակելու միտքը: Հայ կոմպոզիտորներից եվրոպական ընթրնմամբ լուրջ կրթություն ստացած Մակար Եկմայանի հետ պարապմունքները Թիֆլիսում Կոմիտասի համար դարձան եվրոպական երաժշտական տեխնիկային տիրապետելու մի յուրատեսակ նախերգանք: Հաջորդ քայլերն արդեն կապվում են Բեռլինի հետ, ուր մեկնեց ուսանելու՝ Կաթողիկոսի բարեխոսությամբ թոշակ ստանալով ազգային մեծ բարերար Ալեքսանդր Մանթաշյանից:

Բեռլինում նա ընդունվում է կոնսերվատորիա, ուր ուսանում է երաժշտական-տեսական առարկաներ, կոմպոզիցիա, սովորում դաշնամուր նվագել: Միաժամանակ Կայսերական համալսարանում հաճախում է փիլիսոփայության, երաժշտական գեղագիտության, ընդհանուր ու երաժշտական պատմության դասընթացներին:

Երեք տարին Բեռլինում անցավ աննկատ: Այդ ընթացքում նա ոչ միայն շատ բան իմացավ, այլև իր վրա հրավիրեց գերմանացի լուրջ երաժիշտների ուշադրությունը: Եվ նա հավասարի իրավունքով մուտք գործեց նրանց ընտանիքը: Իսկ նրա նվիրական սերը հարազատ արվեստի նկատմամբ, դատողությունների անկախությունը և Արևելքի երաժշտության լայնածավալ գիտելիքները խոր հարգանք էին հարուցում:

1899թ. Կոմիտասը նոր ստեղծված Միջազգային երաժշտական ընկերության հրավերով Բեռլինում դասախոսություն կարդաց՝ նվիրված հայ եկեղեցական ու աշխարհիկ երաժշտությանը: Դասախոսությունը այնքան մեծ հետաքրքրություն առաջացրեց, որ կրկնվեց:

Նույն տարվա սեպտեմբերին Կոմիտասը վերադարձավ Էջմիածին և ստանձնեց ճեմարանի երաժշտության ուսուցչի ու երգչախմբի ղեկավարի պարտականությունները:

Կարճ ժամանակում նա արմատապես փոխեց երաժշտության ուսուցման դրվածքը ճեմարանում: Հայկական նոտագրությանն առընթեր ներդրվեց և եվրոպականը, ձեռք

բերվեցին եվրոպական նվագարաններ, ստեղծվեց ոչ մեծ նվագախումբ: Բարձր վարպետության հասավ երգչախմբի կատարողական մակարդակը:

Կոմիտասի ժամանումը նշանակալի աշխուժություն հաղորդեց Էջմիածնի կյանքի ընթացքին: Եվ խնդիրը միայն այն չէր, որ Հայաստանի մի անկյունում սկսում է հորդել երաժշտական բարձր արվեստի աղբյուր: Բացառիկ առիթնուղ էր և Կոմիտասի անձը՝ անհանգիստ, եռանդուն, նա վարակում էր ամենքին իր դուրահաղորդությամբ, վիթխարի ներքին հմայքով:

Կոմիտաս բանագետի, գիտնականի, ստեղծագործողի գործունեությունն այդ շրջանում շատ արդյունավետ էր և արգասավոր: Ժամանակակիցների վկայությամբ Կոմիտասի հավաքած ժողովրդական երգերի թիվը հասնում էր երեք-չորս հազարի:

1904թ. նա հիմնականում ավարտին է հասցնում գեղջկական երգարվեստի առավել հատկանշական նմուշների յուրատեսակ համահավաք կազմելու աշխատանքը: Ժողովրդական երգերի ժողովածուն, որն այժմ հայտնի է «Ազգագրական ժողովածու» վերնագրով, դարձավ հայկական ժողովրդական /գեղջկական/ երաժշտության իսկական հանրագիտարան և մինչև այժմ մնում է չգերազանցված նմուշների հարստության ու գեղարվեստական արժեքի իմաստով:

Կոմիտասի ուսումնասիրություններով՝ նվիրված հայկական հոգևոր և ժողովրդական երաժշտությանը, փաստորեն հիմք դրվեց ազգային երաժշտական միջնադարագիտության և ազգագրության: Նրա աշխատությունները՝ գրված ամենայն գիտական ջանադրությամբ և միաժամանակ պարզ, հաճախ բանաստեղծական լեզվով, բացահայտում են ժողովրդական և հոգևոր երգարվեստի կենցաղավարումն ու տարածումը, ժանրերի բազմազանությունը, բանաստեղծական և երաժշտական լեզվի առանձնահատկությունները: Նրանց մեջ սփռված թանկարժեք շատ մանրամասներ ապշեցնում են դիպուկ դիտարկումներով՝ այնքան կենդանի ու պատկերավոր, որ դրանց ետևում տեսնում ես միայն մեծ արվեստագետին հատուկ խորաթափանց հայացք ու հանճարեղ կանխագագում:

Բեռլինից Կոմիտասի վերադառնալու պահից փաստորեն սկսվում է նրա ստեղծագործական գործունեության ինքնուրույն և առավել արգասավոր ժամանակաշրջանը: Այն երկար չտևեց՝ ընդամենը 15-16 տարի: Սակայն այդքան ժամանակն էլ բավական եղավ, որպեսզի հիմնիվեր ցնցեր հայ երաժշտության մասին կայունացած բոլոր պատկերացումները:

Կոմիտաս երաժշտի համար ժողովրդի կերպարը, նրա ոգին մարմնավորում էին ժողովրդի երգերը: Ժողովրդական կյանքի վերստեղծման ձգտումը նրա համար անանջատելի էր ժողովրդական և հոգևոր երգարվեստի բուն նմուշների որոնումներից: Նա մշտապես պայքարում էր այն մարդկանց դեմ, ովքեր փորձում էին ներկայացնել ազգային երգարվեստը «իբրև մեղկ, տխուր, մեղամաղձոտ

երաժշտութիւն մը»: Նրա խորը համոզմամբ «հայ երաժշտութիւնը ոչ միայն մեղկ ու տխուր չէ, այլ համակ ուժ է եւ կենդանութիւն, ու իր մէջ կը սնուցանէ փիլիսոփայութիւնն իսկ, ոգին իսկ իր ցեղին, որովհետեւ երաժշտութիւնը ամենէն մաքուր հայելին է ցեղին, ամենէն հարազատն ու կենդանին անոր բոլոր արտայայտութեանց մէջ – կենդանի, որքան կենդանի է այդ ցեղը, ուժեղ, - որքան ուժեղ է իրեն ծնունդ տվող ժողովուրդը»:[3]

Կենսականություն և ուժ՝ ահա Կոմիտասի ազգային արվեստի ըմբռնման բանալիները:

Կոմիտասի գեղագիտական սկզբունքներն առանձնահատուկ ցայտունությամբ են ի հայտ գալիս նրա աշխատանքային երգերի շարքի մէջ: Կոմիտասի կարծիքով աշխատանքը որոշակի կենսական հանգամանքներում դառնում է գեղջուկի համար հոգևոր և ստեղծագործական ուժերի առավել ամբողջական և բարձրագույն արտահայտություն: Հենց աշխատանքի ընթացքում, բնության դեմ պայքարի և նրա հետ միաձուլվելու մէջ է տեղի ունենում գեղջուկ-շինականի կախարդական վերափոխումը ոգեշունչ բանաստեղծի ու երաժշտի: Եվ այդ ժամանակ նա հանդես է գալիս իբրև «կախարդ վարպետ, որ կարդում է հարազատօրէն բնութիւնը, ստեղծում բազմաբեղուն մտքեր, նոցա փչում է իր հզօր ու պարզ շունչը, դրոշմում է իր բնատրոթեան էականով՝ ներքին եւ արտաքին լրիւ կեանքով եւ կնքում է բառերով ու եղանակով իր հարազատ զաւակը՝ գութաներգը»: /Կոմիտաս/ [4]

Կոմիտասի աշխատանքային երգերը տարբեր են իրենց բնույթով և բովանդակությամբ: Դրանցից առավել հայտնիները՝ «Գութաներգը», «Կալի երգը». «Երկրագործի երգը» գերում են բարձրակերտ կառուցվածքով, կերպարների վսեմ շնչով:

Կոմպոզիտորի ստեղծագործության մէջ քնարերգությունը բոլորովին առանձնահատուկ աշխարհ է: Ժողովրդական քնարական սիրային երգերը Կոմիտասը ընկալում է իբրև ժողովրդի հոգու մարդկային, մարդասիրության էության ամենանվիրական արտահայտություն: Դրանք հրապուրում են իրենց բարոյական մաքրությամբ, հոգեկան զեղումների նրբությամբ ու հարազատությամբ: Հիշենք պայծառ, կրակոտ «Իմ չինարի յարը», թեթև, ասես եթերից հյուսված «Շողեր ջանը», տխուր, վշտալի «Սարերի վրով գնաց», «Գարուն ա», պանդուխտի երգերից՝ «Ծիծեռնակը», հանրահայտ «Կռունկը», «Անտունին», որի մասին կոմպոզիտոր Կլոդ Դեբյուսին ասել էր. «Եթե Կոմիտասը ստեղծեր միայն «Անտունին», ապա դա էլ բավական կլիներ, որպեսզի նրան համարեն խոշոր արվեստագետ»:[5]

1905 թվականին Ճեմարանի 60 հոգանոց երգչախումբը Կոմիտասի ղեկավարությամբ համերգներ տվեց Թիֆլիսում: Համերգներն անցան շոնդալից հաջողությամբ: Դրանք հայ ունկնդիրների հոգում արթնացրին լարեր, որոնց գոյությունը շատերը նույնիսկ չէին ենթադրում: Կոմիտասի մշակմամբ հնչող գեղջկական երգը՝ մինչ այդ գրեթե անծանոթ կամ ռամկականությամբ խրտնեցնող, հանկարծ հառնեց իբրև

ժողովրդական կյանքի ու մարդկային հոգու խորքերին հասնող արվեստ: Երգչախմբի կատարողական բարձր մակարդակը և Կոմիտաս-երգչի /ժողովրդական և հոգևոր երգերի նրա կատարումը միշտ դառնում էր համերգների բարձրակետը/ խորահույզ վարպետությունը լոկ ուժգնացնում էին ընդհանուր գեղարվեստական տպավորությունը:

Թիֆլիսում ունեցած հաջողությունը քաջալերեց Կոմիտասին: Ժողովրդական ու եկեղեցական երաժշտության գանձերի տարածումը, ինչպես երբեք մինչ այդ, ներկայանում էր իբրև ժողովրդի հոգևոր զարթոնքին նպաստող, հանուն ազատության և լավագույն ապագայի նրա մղած պայքարում կամքն ամպրապնդող առաջնահերթ խնդիր: Նա ծրագրում էր նաև, որ աշխարհը ևս ավելին իմանար իր հարագատ ժողովրդի գեղարվեստական ստեղծագործության մասին:

Շուտով Կոմիտասը հրավեր է ստանում արտասահմանի հայերից՝ Փարիզում համերգներով հանդես գալու: Համերգները Փարիզում /1906թ./ աշխույժ հետաքրքրություն առաջ բերին ֆրանսիական հասարակության մեջ: «Իր երկու համերգներով, - գրում էր «Օրոք» թերթը, - Կոմիտաս վարդապետը մեզ ներկայացրեց մեղեդիների մի շահեկան շարք, ուր ըմբռնվեցինք բնավայրի համը ու զմայլվեցինք ներդաշնակության վրա, որ նույն ինքն Կոմիտաս վարդապետի բարձր հմտության ու հանճարի գործն է»:[6]

Փարիզին հետևեցին հայ երաժշտության մասին համերգներն ու դասախոսությունները Շվեյցարիայում և Իտալիայում:

1910 թվականին Կոմիտասը տեղափոխվեց Կոստանդնուպոլիս: Այստեղ զգալիորեն լայնացան նրան մշտապես գրավող արտիստական գործունեության շրջանակները: Նա կազմակերպեց մեծ երգչախումբ, որին տվեց «Գուսան» անվանումը: Կոմիտասի երգչախումբը դարձավ Պոլսի տեսարժան երևույթներից մեկը: Նրա համերգները հավաքում էին բազմաթիվ ունկնդիրներ: Դրանցից մի քանիսի ժամանակ լրիվ կազմով ներկա էր դիվանագիտական կորպուսը: Երգչախմբի մասին հիացմունքով էին արտահայտվում հայկական և թուրքական թերթերը:

Կոմիտասը հաճախ համերգներով ու դասախոսություններով ուղևորվում էր նաև Պոլսից դուրս: Մեծ անդրադարձ ունեցան նրա ելույթները Իզմիրում, Ալեքսանդրիայում և Կահիրեում: Եգիպտական թերթերն անկեղծ հիացմունքով էին գնահատում Կոմիտասի արվեստը: Նրանք արժևորում էին նրա գործունեությունն իբրև Արևելքի հարստագույն երաժշտական մշակույթի հզոր վերածննդի սկիզբ:

1912 թվականին Կոմիտասը Լայպցիգում հրատարակեց երկու ոչ մեծ ժողովածուներ: Դրանց մեջ տեղ էին գտել ժողովրդական երգերի՝ հիմնականում 1907 թվականից հետո կատարած մշակումները: Ինչպես ժողովածուներում ընդգրկված, այնպես էլ այդ ժամանակ նոր ստեղծված, բայց Կոմիտասի կենդանության օրոք չհրապարակված

երկերը նրա արվեստի նորարարական ձգտումների առավել լիարժեք մարմնավորումն են:

Վեհ բանաստեղծության և բուն ժողովրդական արվեստի գույների հյութեղության համադրության մեջ բացահայտվում է Կոմիտասի այդ տարիների ոճի բնութագրական գիծը: Խմբերգային մշակումներում ապշեցնում է աճած վարպետությունը. նա սովորել էր երգչախմբից իրապես կախարդական հնչողություն կորզել: Նոր գծեր են նկատվում նաև այդ շրջանի՝ ձայնի և դաշնամուրի համար գրված երգերում: «Քելեր ցուրեր», «Քելե-քելե», «Կուժն առա», «Ալազյազ», «Կանչե, կռունկ», «Ես սարեն կուգայի» երգերը Կոմիտասի այդ շրջանի վոկալ քնարերգության փառահեղ նմուշներ են:

Կոմիտասն առանձնահատուկ ուշադրություն էր դարձնում հոգևոր գործերի ստեղծման վրա: Անհրաժեշտ է նշել, որ հոգևոր ստեղծագործությունները միշտ զգալի տեղ են գրավել նրա համերգային ծրագրերում: Սովորաբար նրա համերգների առաջին բաժինը տրամադրվում էր հոգևոր երաժշտությանը, իսկ երկրորդը՝ ժողովրդական երգերի սեփական մշակումներին:

Այդ բնագավառում Կոմիտասի առավել խոշոր և նշանակալի ստեղծագործությունն, անկասկած, Պատարագն է, գրված արական երգչախմբի համար /1914թ./: Պատարագը ոչ միայն կոմպոզիտորի ստեղծագործական ուղու զագաթնակետն է, այլ նաև հայ հոգևոր երաժշտության զարգացման բոլորովին նոր փուլ: Պատարագի երաժշտությունը գերում է անկրկնելի գեղեցկությամբ, վեհությամբ, ազգային ոճի բյուրեղային մաքրությամբ: Հենց սկզբում հնչող «Խորհուրդ խորին» զգեստավորման շարականի խորհրդավոր և թովիչ երաժշտությունը կարծես կանխորոշում է Պատարագի հիմնական իմաստն ու տրամադրությունը. ոգու թռիչք դեպի անհուն հեռուները, առ Աստված:

1914 թվականի հունիսին Փարիզում կայացավ Միջազգային երաժշտական ընկերության հերթական համաժողովը: Այնտեղ Կոմիտասը երկու զեկուցում կարդաց և հանդես եկավ իր գործերի կատարմամբ:

Փարիզում Կոմիտասը վայելեց վերջին և թերևս իր կյանքի ամենափայլուն հաղթահանդեսը: Ինչպես հայ, այնպես էլ արտասահմանյան հեղինակավոր երաժիշտների վկայությամբ, Կոմիտասի ելույթները համաժողովի մասնակիցների վրա թողել էին անմոռանալի տպավորություն: «1914 թ. Փարիզի երաժշտական միջազգային համագումարում, ուր հավաքվել էին տիեզերքի գլխավոր երաժշտագետները, - գրել է հետագայում Սորբոնի համալսարանի պրոֆեսոր Ֆրեդերիկ Մակլերը, - Կոմիտասը տվեց հայ ժողովրդական և հոգևոր երգերի համերգ՝ հիացմունք պատճառելով ներկա երաժշտական հեղինակություններին:

Ժողովրդական երաժշտության... մասին նրա դասախոսությունները, պետք է ասել, համագումարի նիստերից ամենաթանկագինը եղան: Երբ Կոմիտասը նստեց

դաշնամուրի մոտ՝ մեղմորեն երգելու հայկական երգ, ունկնդիր հասարակությունը քարացած մնացել էր լուռ, և այնտեղ տիրեց այն վեհական հմայքը, այն գերագույն պարզությունը, որ բխում է հայկական երաժշտությունից»:[7]

Մեկ տարի հետո Կոմիտասի գործունեությունն ընդհատվեց ամենաանսպասելի և ողբերգական կերպով: Կոստանդնուպոլսում 1915 թվականի ապրիլի 24-ից լույս 25-ի գիշերը նա հայ մշակույթի մյուս ականավոր գործիչների հետ ձերբակալվեց և այնուհետև աքսորվեց երկրի խորքը: Կոմիտասը հրաշքով խուսափեց մահից: Բարեկամները, երկրպագուները կարողացան աքսորից փրկել անվանի երաժշտին: Սակայն արդեն ուշ էր: Բեկված բանականությունն ընդմիշտ լքեց նրան: 1915 թվականի դեպքերը, Կոմիտասի ձերբակալումը, ապա հիվանդությունը կործանարար հետևանքներ ունեցան մեծ երաժշտի դիվանի ճակատագրի համար: Նրա ձեռագրերը ցրիվ եկան աշխարհով մեկ, իսկ շատերը անհետ կորան...[8]

Կոմիտասի ծննդյան 100-ամյակին նվիրված կոնդակում Ամենայն հայոց Կաթողիկոս Վազգեն Առաջինը գրել է. «Կոմիտաս վարդապետ բարենորոգիչն է հայ եկեղեցական եւ ժողովրդական երաժշտութեան եւ գիտարարը, որուն գործը կարելի է արժանավորել միայն մեսրոպեան չափանիշով... Ինչպես սուրբ Մեսրոպ քառսէն դուրս բերաւ եւ բիրեղեց ձայները հայ բարբառին, եւ իր ազգին ու աշխարհին պարգեւեց կոթողը հայերէն լեզուին, այնպէս ալ Կոմիտաս վարդապետ՝ պեղեց, մաքրեց ու լոյս աշխարհի բերաւ կոյս աղբիւրը հայ երգին: Եւ բազում տարիներ, անդուլ, անյոգնաբեկ, միշտ նոր աւիւնով ու ստեղծարար տենդով, այդ աղբիւրէն հայ երգին լոյսը բաշխեց իր ժողովրդին:

Հայ ժողովուրդը, Կոմիտասեան երգին մէջ գտաւ, ճանչցաւ իր հոգին, իր ոգեկան ինքնութիւնը: Կոմիտաս վարդապետ սկիզբ մըն է, որ վախճան չունի: Ան պիտի ապրի հայ ժողովրդով, հայ ժողովուրդը պիտի ապրի իրմով, ինչպէս այսօր, այնպէս ալ յաւիտեան»:

[1] Չարենցի անվան գրականության և արվեստի թանգարան, Կոմիտասի դիվան:

[2] Գրական նշխարք Կոմիտաս վարդապետի բեղուն գրչէն, Մոնթրեալ, 1994, էջ 8:

[3] Նույն տեղում, էջ 69:

[4] Կոմիտաս, Հոդվածներ և ուսումնասիրություններ, Ե, 1941, էջ 95:

[5] Տե՛ս, Ս.Գասպարյան, Կոմիտաս, Ե, 1947, էջ 42:

[6] Ժամանակակիցները Կոմիտասի մասին, Ժողովածու, Ե, 1960, էջ 16:

[7] Նույն տեղում, էջ 30:

[8] Այժմ Կոմիտասի դիվանի զգալի մասը կենտրոնացած է Երևանում, Չարենցի անվան Գրականության և արվեստի թանգարանում: 1960 թվականից Հայաստանի գիտությունների ազգային ակադեմիայի Արվեստի ինստիտուտը ձեռնարկել է Կոմիտասի Երկերի ժողովածուի հրատարակումը: Այժմ արդեն հրատարակված է 14 հատոր: